



DUMÌNICA 11 DÈ STÈMBER 2011

Rosare e Santa Mëssa a la Basilica 'd Soperga (Turin)
Onor al Drapò piemontèis e esecussion ëd l'Imn nassional

Për l'ësgond ann i-j ciamroma a la Madòna 'd dene torna na man e 'd ten-e Piemont sota sò mantel. La prima dumìnica apress dla Festa Nassionale da tut ël Piemont e da la Savòja i tornroma trovesse a Soperga për arnové ij vot e presenté nòste intension.

Arneuv dij **Vot** ëd Soperga ant l'ocasion dla Festa Nassionale ëd Piemont-Savòja

1704: arlongh dla guèra 'd sucession d'Èspagna ël Ducat ëd Savòja a l'é anvadù da j'armeje fransèise 'd Luis XIV; Savòja a l'é pèrdù, e parèj Susa, Vërsej, Civass, Ivreja e Nissa. Ai 12 ëd magg dël 1706 Turin a ven butà sota assedi da 60.000 soldà (l'armeja piemontèisa a na conta 6.600, pì 5.000 ëd la Vardia Nassionale). S'as perd Turin, Piemont a dëspariss. Tùit ij di a pieuvo 'n sla Capital pì che 8.000 canonà. L'eròe Pero Mica, la neuit dij 30 d'aost, a sacrifica soa vita për antèrdi l'intrada dj'inimisi da le galarie; parèj 'd chiel vaire e vaire d'òutri eròe senza nòm.

Ai 31 d'aost la Beata Vèrgin Maria as mostra ant n'aparission a Mare Maria dj'Àngej, e a-j dis che se Turin a la pija për Protetriss e a-j dedica na festa a costa profession, dnans dël di 'd soa Natività a sarìa stàit delivrà da l'assedi.

Ai 2 dè stèmber ël Duca Vitòrio Amedé II e sò cusin ël Prinsi Eugeni 'd Savòja, comandant ëd l'armeja imperial, ruvand da Chér a monto an sël Brich ëd Soperga për vaité la landa con j'assediand rangià dantorn ai rampar dle fortificassion, e lì a decido la strategia dl'assaut.

A cola mira a intro ant la gesiòta dla Vergin-a dle Grassie ch'a-i era an sël Brich, a s'anginojo ai pé dla statua, a-j

ciamo a la Vèrgin Maria la profession ëd la Capital e fan vot che, s'a l'avèissa salvà 'l Piemont, a l'avriò edifià na gròssa basilica për feje onor.

A l'alba dij 7 dè stèmber 1706 j'austrò-piemontèis a-j dan l'assaut a le trincere fransèise. Fin-a le milissie assedià a seurto da 'n Turin e a bogio l'atach. L'inimisi a l'é an dèrota a 3 bòt dël dòp-mesdi. Èl Duca e 'l Prinsi a intro an Turin delivrà, Piemont-Savòja a l'ha dësfindù soa indipendensa. Për onoré 'l vot, dël 1717, pen-a riardrissà le finanse dl'Èstat, Vitòrio Amedé a-j confida a l'architet Flip Juvara la costrussion ëd la majestosa basilica, consacrà dël 1731.

Da antlora ij 7 dè stèmber a l'é la Festa Nassionale dël Piemont-Savòja, nòstr Pais. La Festa Nassionale a l'é stàita stèrmà, parèj ëd tuti ij simboj, ij leu e 'd tut lòn ch'a marca nòsta stòria e ch'a l'é significativ për nòstr pòpol e soa identità.

Essend rivà 'l temp d'arpijesse lòn ch'a l'é nòstr e che ij vej Piemontèis a l'han lassane, i voroma giusta pijé l'andi da la Festa Nassionale e da l'arneuv dij vot për la liberassion ëd Piemont-Savòja da tut ël mal e 'l brut ch'a l'é tacasse a nòstr pòpol e a nòstr Pais.



PROGRAMA:

- Randevò a 10 e 'n quart an slè spiassal dla Basilica, an facia a la colonada.
- Sant Rosare an lenga piemontèisa ant la Capela dël Vot.
- **A 11 ore, la Santa Mëssa an Basilica.**
- **A la fin, l'Arneuv dij Vot ëd Soperga; onor al Drapò piemontèis e esecussion ëd l'Imn nassional.**

Peui, për chi ch'a l'ha piasì, i androma ansema a disné, arlegrà da la mùsica piemontèisa.

Possibilità 'd visité la basilica, ëd monté an sla cùpola, rendje omage a le tombe reaje e la pera comemorativa dël Grand Turin.

Për ëd rason d'organisassion a l'é amportant che chi ch'a l'ha piasì 'd pijé part a l'Arneuv dij Vot a telefona ai nùmer 011 7640228 – 339 2100604 - 238 1292172 dnans e nen pì an là dij 28 d'aost – giovpier@yahoo.it – www.gioventurapiemontèisa.net